



FR. BALDUINUS JO. CALVINÓ S.



Nunquam ad te scribo, Joannes CALVINE, nisi provocatus, atque etiam coactus: neque unquam ad te scribere instituo, quin statim mihi in mentem multa veniant abs te scripta, quæ, ut me, & te admoneam, imprimis repetenda esse sentio. Aliud alio tempore occurrit: nunc familianter, & bonâ tibi dicam fide, quid superioribus fortè diebus, cùm mihi ad te scribendum etiam invito esset, sese obtulerit. Soleo manè, antequam civilibus studiis me dedam, aliquid ex Sacris Literis delibare. Cùm legerem

gerem Michæam Prophetam, primum occurrit, quod fulminat adversus eos, qui ædificant (ut ait) *Sionem in sanguinibus* *: deinde cum reliqua persequerer, recordatus sum, non temerè te in unâ, aut alterâ ejus Prophetæ prælectione admonuisse, *Eum* (ut ait) docere, non armatâ manu, neque vi gladii subigendos esse populos; sed verè esse, & penitus reformatos, ut se Deo subjiciant; ut coalescant in corpus Ecclesie, & fiant unus populus cum filiis Abrahæ. Tum addis: *Nultus est verus Evangelii profectus inter nos, nisi vigeat charitas, & benevolentia, & studium etiam exercendæ beneficentiae.*

Item: *Apud nos Hypocritæ jactant nomen reformationis; interea hæc mera sunt ludibria, quibus prophanatur nomen Dei, ubi non viget in cordibus sincera pietas.*

Et ad OSEAM Prophetam annotasti, eos quidem ridere aliorum superstitiones, sed interea esse Cyclopes, in quorum cordibus sit mera barbaries.

Hæc tu verè profectò, atque ingenuè. Sed hoc tempus flagitabat, ut paulò diligentius exponeres, quid sit, quod non modò ille Propheta Michæas, sed & ipse Isaías, totidem quidem verbis primam veræ reformationis veluti regulam, aut significationem hanc describit: *Contundent gladios suos in ligationes,*

* C. 3. v. 10.

nes, aut vomeres, & lanceas, hastasque suas in falces, neque ultra aut bellum addiscent, aut prælio assuescent. *

Non temere est, quod duo Prophetæ iisdem verbis significant, talia fore principia, atque insignia Regni Christi, sive Ecclesiæ Reformationæ. Nunc autem, quam tu vis reformationem existimari, cum audimus, videmus, sentimus, illud potius fieri, quod nobilis Poeta dixit:

Et curvæ rigidum falces curvantur in ensim:

Ais, non esse in terris querendum comple-
mentum superioris prophetæ: fatis esse, si ejus iniuria degustemus. Sed ne haec quidem nobis delibanda propinas, cum in istâ tantâ gladio-
rum licentiâ, atque impunitate, non modò pietatis, sed & ipsius humanitatis omnia prin-
cipia tolluntur; & crudelissimis odiis ardent
animi, oculique singulorum; & cædibus, at-
que sanguine manus madent; & bellis plus-
quam civilibus cives commissi sunt. Imò eti-
re conditi gladii essent, tamen ubi ipsi styli,
tanquam mucrones exacuuntur, & calami spi-
cula sunt, atque hastæ; & sicarii sunt libelli,
qui se de Religione contendere mentiuntur, &
ora Concionatorum sunt classica, qualem esse
dicemus profectum Evangelii? qualem
significationem reformationis? Hæc tibi dico,

* Jes. C. 2. §. 4.

Calvine, non quòd tibi, tuísque tantùm ob-
jicienda sint, quæ & nobis sunt inculcanda:
sed quòd tu, qui imprimis meminisse debe-
res, magis tunc eorum oblitus esse videaris:
ac ne quidem tuarum in hoc genere concio-
num serìò recorderis; quas tamen reipsâ ur-
gere oportebat, ne, cùm verba de pietate
fecisti, verba dedisse dicaris: néve, quam no-
minis Divini profanationem cum mero ludi-
brio conjunctam esse pronuntiasti, veram, &
Christianam esse reformationem, nunc agno-
scere existimeris.

Juvat autem nunc adjicere, quod apud
eundem Jesaiam Prophetam legebam de con-
ditione Ecclesiæ Christianæ, C. II.: ibi præ-
dictit, Christum ità regnaturum esse, ut ejus
sceptrum non in manu, sed in ore sit, ut tu
ipse annotâsti: *Quia (ut ais) non armorum pa-
tentia, sed doctrinâ Evangelii dominabitur.*
Prædictit deinde, in populo Christiano nul-
lum (utar tuis verbis) affectum nocendi, nullam
ferociam, nullam inhumanitatem fore; & cùm
antea fuerint veluti Leones, ac Pardi, instar
Ovium, & Agnorum futuros esse, omnem im-
manitatem, bellumque affectum deposituros.
Quinimo *Puer parvus* (inquit Propheta) eos
ducet, atque veget. * Quo loco admones, pue-
ris comparari Ministros verbi, quòd vim nul-
lam exteriùs adhibeant. Obscro, an hanc

pro-

* Jes. Cap. II. v. 7.

prophetiam in tuis potius. quam in veteribus Christianis impletam esse dices, ut nunc triumphent? De bello Germanico aliquando & dixisti, & scripsisti, nullam cladem tam metuendam esse, quam nimis triumphale Evangelium, quod nos ad insolentiam efferret. Quid nunc? An magis, quam unquam, elata insolentia signum est triumphantis Evangelii? An principium, fundamentumque Ecclesiæ Reformatæ? Quid igitur inane nomen reformationis, quod merum (ut ais) ludibrium est, tam inflatis buccis, tantòque supercilioso nunc jactari pateris?

Fateor, non posse te præstare factum alienum. Verum cum non solùm pateris, tam speciosum titulum obtendi tam indignæ deformitati; sed ipse etiam eum prætexis; an nullam Christo injuriam, nullâ bonorum, atque religiosorum hominum fraude facis? Liberè, & familiariter, sicuti soleo, tecum agam; & cum tria potissimum esse sentiam, quæ curare debeas, si es, qui vis videri, rogabo, ne tui officii obliviscaris. Primum illud, ac præcipuum, quod veluti est substantia Religio-
nis, & sine quo non est Religio, sed hypo-
crisis, ad animos hominum regenerandos, atque intus reformandos pertinere non ignoras. Ex eo dependent alia duo, quæ exteriora sunt, dico modum Religionis propagandæ, atque defendendæ, & ipsius Ecclesiæ formam. Ut autem in illo primo capite, sic in duobus istis,

minimè jam aut curare, aut præstare videris,
quod imprimis debes, ut veræ, & legitimæ
reformationis titulum evincas. Regibus, Prin-
cipibus, Magistratibus suum jus gladii, ut de-
bemus, linquimus : Sed qui sunt Religionis
Administri, & solo verbo, ac voce Evange-
lium propagaturos se esse professi sunt, neque
armatâ (iterum dico) manu, neque (ut ais) vi
gladii suam reformationem obtrudere debent.
Quid enim minus esset Apostolicum ? quid
magis esset Arianum ? Quid igitur tu de po-
stremis tuorum actis tandem judicas ? Nam
diutius connivere non est integrum. Certè
cum nuper in tui MELANTHONIS Chronico le-
gerem illud de Pseudoprophetâ, ex Alcorano
repetitum : ἐν ἦλθε διὰ Θαυμάτων, ἀλλὰ διὰ
Ξιφών, δύνας τὸν νόμον *, statim judicavi, do-
cendi exemplum, quod moribus Christianis
planè contrarium esset, describi : neque non
veritus sum, ne hoc tempore quidpiam tale
fortè dici posset de quibusdam, qui Christo
nomen dederunt : simul autem venit in men-
tem, quod narrant de Ismaele Sopho, Persa-
rum Rege, & ejus Prophetâ Tiehelle, cuius
præpostoram, funestamque reformationem
(si reformatio dici debet) Patrum nostrorum
memoriâ, infelix Oriens vidit. Ità est sanè:
ille sive Ismael, sive Tiehelles, uterque cru-
delis

* Non venit, per miracula, sed per gladium
legem darg.

deīlis impostor, malam causam malē egit, hoc est: Mahometanam superstitionem (cujus aliquam fortasse speciem externam mutabat, ut alteram, & novam ejusdem insaniae formam substitueret) more Mahometano reformabat, simul & propagabat.

Sed scis tantò magis talem morem, & agendi exemplum tale, alienum esse abs Religionis veræ conditione. Quinimò nostros olim (ut vocantur) Maccabæos causam bonam malē egisse pronuntiasti: cur ita? Credo equidem, quod non solum cum Regno Sacerdotium conjunxerint; sed etiam, quod in armis minùs sibi temperarint; quibus tamen alioqui injustum vim tyranni Antiochi repulerunt, & cultum Dei restituerunt, & Templum purgarunt, ut ipsemet ais. Ac quidem ferre non potes, quod Judas Sacrificium pro peccato mortuorum fieri procurarit *, quia id Lege Mosaicâ mandatum non fuisse dicatur. Encænia tamen festa ab eodem instituta **, præter illam Legem improbare (credo) non audebis, cùm & ea Christus observasse videatur. Ceterum illius renovationis exemplum velim alioqui observes, quod magis nunc simplex reformatio instituatur, quæ tantum antiquæ formæ restitutio sit. Nam & quemadmodum Templum Hierosolymitanum, rursus extactum, non

A 5 discessit

* 2 Maccabæ. C. 12. v. 43.

** 2 Maccabæ. C. 10. v. 8.

discessit ab effigie prioris: sic & abs Judâ repurgatum, quod antea fuerat, fuit: ac licet ille lapidibus pollutis uti ausus non fuerit ad holocausti altaria rursus extruendum; saltem lapidibus, juxta legem, integris extruxisse aram novam, quæ tamen priori similis esset, historia illa disertè refert, *. Sanè ut alias Maccabæorum actiones non probare te dicas; tamen non dubitas eorum auxilium prædici, prædicari, atque commendari abs Daniele & obiter notas, quod ille addit, multos in blandiis accessuros, hoc est, hypocritas multos Judæ illius castra secuturos esse. *At inter nos (inquis) qualis est mixtura?* Sed, priùsq[ue] Maccabæorum exemplo utaris, CALVINE, necesse est, ut dissimilitudinem, quæ inter vos maxima est, nullam esse ostendas.

Tu, cùm in Danielem præfaris, tuos in Galliâ Ministros præmonens, ais, improbos, & perfidos, fallaci zeli jactantiâ, Judæ, & ejus fratribus se adjunxisse; eoque artificio Satanam infamiâ aspersisse manum à Judâ collectam, ac si latrunculorum turba esset. Sed si vis similem esse causam, conditionemque tuam, majorem dare operam debebas, ut nihil simile, aut commune cum talibus Zelotis Tui haberent: ut se ab iis segregarent: ut eorum Societatem fugerent. Atqui homines religiosos, qui abs talibus se se sejunxerunt, clamas

* I Maccabæ. C. 4. v. 47.

clamas, perfidos esse Apostatas; cur non & Antiocho servire clamas? vel etiam colludere cum Menelao, & Alcimo, perfidiosis, non Pontificibus, sed proditoribus, qui cum Antiocho, vel Demetrio conspirabant? Sed hæc convicia sunt, quæ in te recidunt, & quibus aliam potius factionem ornare deberes. Illud modo vide; si (ut ais) non possis planè excusare Maccabæorum fratrum actiones; qui poteris hoc tempore non solum defendere, sed etiam laudare acta Tuorum?

Nam & si laudare soleant exemplum illius Iehu, qui trucidavit Baalaticos sacrificios, & evertit domum ipsius Achab *; tamen tu eum non reformationem, sed latrocinium instituisse pronuntiasti, & propterea Hosæam Prophetam factum illius detestari admonuisti; ubi & cum illo Iehu comparasti Henricum Angliæ Regem: Sed iterum vide, nè domi tuæ habeas Reformatores, qui cum eo potius conferringi sint: nam & olim, cùm in Jesaiam scriberes, scripsisti, pios Principes sequi debere illum Iehu. Adeò, cùm vis, variè loqueris.

Evidemtibz aliquando audivi, quod tuæ reformationi prætexebas exemplum Nehemias, dantis operam instaurandi Templi, atque urbis Hierosolymitanæ **, cùm architecti altera

* 4. Reg. C. 10.

** L. 2. Esd. C. 4.

alterâ manu trullam versabant, alterâ gladium
(sed quo tantum depellerent hostes incurrentes)
vibrabant fortiter. Verùm quām magnam
rursus dissimilitudinem putas nunc notari inter
vos, actionésque vestras posse ? Ocioſa eſſet
hæc quoque comparatio. Ergo faceſſat.

Videamus verò de Ecclesiæ formâ, quæ reſtituenda ſit; cùm hoc tempore omnes paſſim
de reformatione loquantur. Scimus, & lu-
benter fatemur, interiorem quoque, & ſpi-
ritalem ejus eſſe quandam pulchritudinem,
quam Mundus non videt. Sed de eâ nunc
quæritur, quæ ſit aspectabilis: tu quodam in
Jefaiæ loco agens de Ecclesiæ ornatu, allegas
ex Psalmo *: *At gloria Filiae Regis ab intus*
eft, tametsi cùm Psalmos interpretaris, id aliò
referri, atque pertinere ſignifices. Nos mo-
dò quæramus de formâ, quæ exterior eſt, &
eſt iñſtituta ad homines in Religione continen-
dos; cùm hi, ex quibus Ecclesia colligitur,
non ſpiritu ſolo, & animo, ſed & corpore
conſtent.

Mirum verò, cùm olim de Religione, &
ejus doctrinâ, fideique, ut vocantur, Capiti-
bus tam magna eſſent certamina; tamen for-
mam Eccleſiarum, alioqui diſſentientium,
eandem ſemper, & conſentientem fuiffe.
Olim, ſiquis Arianorum cœtum ſpectaſſet,
existi-

* Ps. 44. v. 14.

existimare potuisset, esse Catholicorum: nam iidem ritus, eadem erant ceremoniae. Hodie cum talis non sit in ipsa doctrinâ dissensio, qui sit, ut formae dissimilitudo, atque diversitas tam magna sit, quæ populos imprimis perturbat, ac veluti committit? Cujus partis culpâ id fiat, alii judicabunt.

Sed apud te dissimulare non possum, quod ad te pertinet. Cum AMBROSIUM, CHRYSOTUM, AUGUSTINUM lego, Ecclesiæ toto tunc Orbe diffusæ quædam meis oculis effigies obversatur: eam ipsam non occurrere in tuâ reformatione, profectò miror: & vereor, ne tanta diversitas, atque differentia in multorum animis cieat suspiciones, quas nolle. Memini, cum ad CAROLUM V. Imp, & Imperii Germanici Principes scriberes de necessitate reformandæ Ecclesiæ, ne quis miraretur, omnia confusè hoc tempore disjici; spem dabas, fore, ut non manerent tales ruinæ: dicebasque, cum domus, quæ instauranda est, diruitur, lapides integros simul, & vitiosos pariter quidem dejici, sed postea seligi, repetique eos, qui instauratiōni utiles sunt. Atque ita loquebaris, ut te hactenus tantum dejecisse, postea verò instauraturum esse, significares. Atqui ab eo tempore ne lapidem quidem unum apposuisti, cum tamen in tuo Regno tibi, quod lubet, liceat. Itaque, quas antea profitebaris tantum esse veluti parietinas,

nas, ruderibus cumulatas, jam pro integro, perfectòque ædificio habere videris. Hinc nostra dissensio: de quâ tamen Verbum non fecissem, nisi tu me téisque quatérque provocando respondere coegisses. Nunc si verbosior sim, scito, metu quodam id fieri, ne meam sententiam Calumniator aliquis detorqueat; dicam tamen verbo uno, transfigi inter nos posse, si (ut debes) Reformationem malles, quâ Transformationem: & cùm duæ, ab Orbe condito, potissimùm fuerint aspectaciles formæ, tu ad secundam redires potius, quâ tertiam aliquam effingeres.

Hic, bonâ tuâ gratiâ, mihi licebit, quod te optimè scire minimè dubito, jam repetere, ut me, & alios commonefaciam: formam Ecclesiæ Judaicæ Moses præscripserat Annis propè quingentis, antequam Salomon eam, extructo Templo (cujus etiam effigies in Moysaco Tabernaculo delineata fuerat) numeris omnibus perfectam expresserit: sic enim multis interea certaminibus Ecclesiæ exerceri, & multorum Sæculorum ærumnis priùs affligi Deus voluit. Ut autem Salomon lineamenta, veluti à Mose ducta, religiosè secutus est in suæ Ecclesiæ constitutione, neque minùs in ceremoniis describendis, quâ in ipsius Templi struēturâ: Sic & deinde, ut ut populi Judaici varia jaētatio fuerit, & fuerint illius Reipubl. multiplices casus, ad eandem tamen formam

formam instauratio revocata est; ut, licet ab aliis Templum secundò, aut tertio extructum esset, tamen Salomonis semper esse diceretur.

Christo exhibito, necesse fuisse omnes illas ceremonias facessere, totamque illam veluti umbram evanescere, ut altera Ecclesiæ forma, & species substitueretur, audio. Quid igitur? Prophæ antea acerrimè quidem fulminaverant adversus abusus, corruptelas, vitiæ; sed longius progressi non erant, neque aliud tentaverant; Apostoli verò senserunt, interea dum alia vis Templum ipsum evertret, se se ceremonias illas abolere debere, ut alteram Christi Ecclesiam & colligerent, & erigerent. Neque sanè in illâ abrogatione persuadendâ minus laborârunt, quam in Gentium Vocatione (ut appellatur) afferendâ. Sed neque minus in subrogatione novæ (ut ita loquar) formæ sudatum est: nam & trecentis annis pugnavit potestas Romani Imperii: Tandem post multa certamina, CONSTANTINO Imperatore, Ecclesia Christiana non solum libera, sed etiam Victoria cepit cum aliquo splendori, externoque decore attollere gloriam, & decus novæ suæ constitutionis.

Si CONSTANTINUM propterea cum Salomone compararem, facerem, quod veteres Christiani, & gravissimi inter eos Scriptores fecerent. Et tu, quod Jesaias prædixerat, fore, ut Reges tandem essent veluti nutritii Ecclesiæ, tum

tum (spero) fateberis de CONSTANTINO recte intelligi, quod AMBROSIUS de VALENTINIANO suo id interpretatur. Sed illud modò dico: ut, quod Aggæus Propheta pollicitus erat, novi templi gloriam majorem fore priori, ad Ecclesiam Christianam pertinere fateris; sic, quam hujus Ecclesiæ majestatem, magnificentiam, splendorem, ordinem Jesaias prædicat potissimum prodiisse, atque extitisse toto illo sæculo, quod fuit abs CONSTANTINO usque ad AUGUSTINUM, aliquando confessus es.

Scio etiam sub cruce speciosam esse Ecclesiam, cuius interior, & spiritualis est decor; tantum abest, ut ejus dignitatem alligem alicui externo splendori. Sed ubi in pace, & libertate quæritur de aspectabili specie, & formâ, non avertam oculos ab illâ, quam dixi, effigie; neque somniabo fallacem tantum larvam fuisse: neque profectò hanc imaginem quisquam repudiabit, qui modò credit, aliquando conspicuam Ecclesiæ liberæ faciem in hoc terrarum Orbe floruisse. Nunquam suis eam nævis caruisse fateor: sed pro intolerabili deformitate habere non possum illam ejus constitutionem, quâ non est olim alia in Orbe nostro visa illustrior. Non audeo dicere, quod AMBROSIUS aliquando significavit, Ecclesiam similem esse Lunæ nascenti, quæ indies splendet: quanquam si, quorsum id dixerit, meminerimus, recte dictum videri possit. Cæterum

terum nè longior sim: aut nulla in hoc Mun-
do conspecta est Ecclesia, quo tempore maxi-
mè speciosa spectata, agnita gloria palam
fuisse dicitur; aut certè illa fuit, quam AMBROSIUS
in Italiâ, HILARIUS in Galliâ, CHRYSOSTOMUS,
& BASILIUS in Oriente, AUGUSTINUS in Africa,
CYRILLUS in Ægypto, suâ ætate gubernarunt,
nobisque descriptam reliquerunt.

Et verò tu ipse aliquando scribens ad SA-
DOLETUM, visus es agnoscere, quod dico,
cùm scriberes, si veterem illam Ecclesiæ fa-
ciem, qualem horum, quos dixi, Scripto-
rum monumenta exprimunt, & deinde rui-
nas, quæ supersunt, contemblemur, posse
videri illam fuisse Ecclesiam, qualis sub Davi-
de, & Salomone floruit; hanc verò, qualis
sub Sedeziâ, & Joacim vitiata erat. Et qui-
dem tu eodem loco hæc adjicis: *Falso opina-
ris, ab eâ Dei colendi ratione, quam semper ob-
servavit Ecclesia Catholica, nos abducere velle
Populum Christianum &c., Scis, nos nihil aliud
conari, quam ut instauretur aliquando vetusta il-
la Ecclesiæ facies.* Ergo, CALVINE, si jam
sententiam non mutâsti, consentimus.

Apertiùs etiam postea mihi dictâsti, quod
nunc urgeo. Nam non solum, cùm de scan-
dalibus ageres, dixisti, ubi suos fasces Christi
Regno submisit Imperium Rom., Ecclesiam
in beatâ quietis, & gloriæ sede collocatam
fuisse videri, nisi Hæretici turbas excitâssent.

B

Sed

Sed & in *Præfatione ad Jesaiam*, cùm Angliae Regem alloqueris, primum, ais, *singulare Domus Dei ornamentum fuisse*; cùm *Romani Imperii Celsitudo se Christo summisit*: postea Sponsam Christi tam pretioso, ut loqueris, habitu nudatam, tantâ dignitate spoliatam, tanquam splendido decore privatam, fuisse redactam in miseram deformitatem. Hic ergo rursus consentimus: sed cùm ad rem ventum est, tibi non constas. Quid enim? si jam exponam, quo habitu, quâ dignitate, quo decore prædicta Ecclesia fuerit, cùm Imperatores, exemplo *CONSTANTINI*, facti sunt Christiani, an tales reformationem admittes? Utinam faceres! facile tunc inter nos conveniret.

Atqui tu me ferre non potes, cùm te ad illud Sæculum revoco; quod quâm insipidum esset, Auditores tuos etiam considerare jussisti, cùm *Zachariam Prophetam iis prælegeres*. Fuerint sanè semper aliqui omnibus Sæculis insulti homines: vel etiam in singulis alioqui hominibus & præstantissimis, & doctissimis fuerit aliquid vanitatis, aut ineptiarum; sed ut propterea nullum in his salem fuisse, dicere non debes, sic sæculum, quo vix ullum unquam fuit illustrius, eruditius, religiosius, insultæ fatuitatis damnare minimè deberes. Ego quidem alterum nescio, ad cuius admiracionem magis te revocare possim. Itaque, velis, nolis, ad illud ut subinde respicias, sæpius rogabo.

gabo. Atque ut Iudæi, ex Babylone reversi, instante Zachariâ, cum suum Templum instaurarent, secum reputabant, qualis structura Salomonis fuisset; si quid meâ voce possim, instabo, ut in eam, quam dico, formam beati sæculi, non adumbratam, sed expressam, propius intueantur nostri Instauratores, & tu diligenter tecum reputes, num oporteat tertiam potius tanquam idæam novam effingere.

Habet doctrina Religionis suam (ut Apostolus vocat) Hypotyposin; habet & suam ipsa ἐνταξία * Ecclesiæ. An nulla olim fuit, cum maximè esse poterat, quæ nunc digna sit, quam imitemur? An tu potius ad eam formam delendam, quæ secunda fuit, facere potes & debes, quod necessariò semel fecere Apostoli ad inducendam ** primam, hoc est, Mosaicam? An rursus alteram & abrogationem, & subrogationem tali exemplo tibi mandatam esse dices? Patere, ut rem eandem pluribus verbis inculcare sæpius possim. Scio, neque dissimulo, quænam, post Christum exhibitum, sit libertas Religionis, ceremoniis minimè alligatæ. Scio, ceremonias Mosaicas, antea necessariò observandas, postea necessariò abolitas fuisse: scio, ceremoniarum Christianarum aliam esse rationem. Sed illud modò

* Bona ordinatio.

** Induco aliquando accipitur pro aboleo, & lituram facio.

quæro, cùm aliquibus utendum sit, an non eas, quæ & olim apud Christianos in usu fuerunt, & nunc commodè esse possunt, neque sunt alioqui abrogatæ, retinere debeamus potius, quàm novas excudamus? Cumque exemplum reformationis requiritur, num omnino effingendum sit veluti cuiusdam novæ Ecclesiæ tertium quoddam genus potius, quàm ad illud, quod ubi integra constituendi libertas fuit, pulcrè expressum est, & cujus etiam una linea-
menta supersunt, restitutio nostra revocetur; an potius patieris cœlum terræ misceri?

Memini, cùm in Epistolam ad Galatas scriberes, quàm, non dico severè, sed morosè damnes Christianos veteres, quos suspicaris parùm animadvertisse, cur Deus ceremonias Mosaicas abrogaverit, & aliter populum Judaicæ, aliter Christianæ Ecclesiæ regendum, atque continendum esse judicarit; ut, quæ illi Pœdagogiæ * necessaria fuit, huic eam non esse utilem evincas. Evidem discriminem, quod Apostolus indicat, observo! sed vide tu, ne, cùm observare non vis, quod etiam invitus experiris, confusè, intemperanter, & temerè non solum misceas, quæ discernenda sunt, & recta judicia veterum depraves; sed etiam ineptè fingas, Angelos quosdam esse planè spi-
rituales, quos scis, & sentis in populo quoque tuo

* Institutio.

quo nimium homines, nimiumque corporales
esse.

Non esse Iudaismum abs Christo abrogatum, rursus erigendum, ut imperitis consularunt, ait in tuâ Institutione: fateor. Ait, Christianum notasse hoc discrimen veterum, & novorum cultorum, cum alloquitur mulierem Samaritanam: fateor. Addis tamen, omnino esse utile rudioribus etiam Christianis adminiculum aliquarum ceremoniarum, sed eas pauciores faciliores, simpliciores esse debere. Rectè: Sed quæritur, tuæne sint demum illæ? Saltem definito modum, quem solum probas, si non putas eum, qui probari possit, posse in eâ Ecclesia, de quâ loquimur, inveniri, etiam si rectus usus, & religiosa ingenuitas accedat.

Ait, AUGUSTINUM in Epistola ad Januarium jam suo tempore conquestum esse, Ecclesiam, quam Dei misericordia liberam esse voluit, sic premi, ut tolerabilius fuerit Iudæorum conditio. Cur non bonâ fide recitas ejus querimoniam? Loquitur de quibusdam (ut vocat) humanis præsumptionibus, quæ (ut ait) neque sanctorum scripturarum authoritatibus continentur; nec in Conciliis Episcoporum statutæ inveniuntur; nec consuetudine universæ Ecclesiæ roboretæ sunt: Sed diversorum locorum diversis moribus innumerabiliter variantur. Atqui ejus generis servilibus (ut etiam vocat)

oneribus premendam esse Ecclesiam, quis jam dicit? Tu verò cur ex eādem ad Januarium Epistolā non repetis definitionem, de qua nunc quæritur? Cur hac in re saltem AUGUSTINI iudicio non stas? Cur & eum repudiās modum, quem non solum ille valde probavit; sed & ejus temporis Ecclesia libera vchementer laudavit, & lubentur amplexa est? Quid multa? Ut ut concedamus, in ratione gubernandæ Ecclesiæ, & religionis (sicuti loquuntur) liberum esse, sequi, quod jam placet: dicemus tamen, cavendum saltem esse, ne Ecclesiam Christianam, quæ olim fuit, cùm esse optimè constituta diceretur, repudiare videamur, ut priorem Judaicam. Hæc ita cautio libertatem illam quodammodo constringit. Non affingo præcisam (ut vocant) aliquam servitudinem: At temper rogo, num, ut serviamus unitati; & antiquitati, quod debetur, deferamus, debeamus, possimusve sequi vestigia, quæ dixi: ubi quidem nulla satis idonea causa est (sicuti non esse in eo, de quo loquor, exemplo existimo) cur illa tam valde refugiamus, malimusque nostro dissidio dissolvere harmoniam Orbis Christiani, & novitatis studio veluti conspicere, atque conculcare faciem veteris Ecclesiæ Christianæ, & eam conculcando, nostram Religionem in multorum animis labefactare, aliarumque gentium ludibrio expōnere.

In tuis quidem Scandalis * cautè significas, te non nisi mille ab hinc annorum consensum oppugnare; superiorum verò sæculorum Ecclesiam revereri. Sed hanc distinctionem, cùm ad rem ventum est, minimè sequeris. Quid juvat tot uti circuitionibus? Non sunt omnes homines tam fungi, tam stipites; non adeò rerum, temporumque imperiti sunt, ut nesciant, te verba dare, cùm ità loqueris. Feceris quidem certè magis ingenuè, si apertè fatearis, te confusè convellere, quæ abs mille quingentis annis, ut quæ ab annis mille, invaluere.

Magnum verò, & difficile est hoc opus, quod suscipis; sed veterem Christi Ecclesiam novi Judaismi ream nunc facere, facinus est multò majoris audaciæ. Molestus fortasse tibi sum monitor, & videbor ineptus: Sed non possum satis rogare te, ut diligentius cogites, ecquo tandem res evasura sit; neque temerè audias eum, qui te in Ecclesiâ non modò Dictatorem, sed & Cancellarium quendam esse dixit; & posse te quidvis cancellare, ut unâ tantum literâ sit opus: atque etiam adjecit, tam te formam olim ab Christianis editam omnino expungere debere, quàm Apostoli expunxerunt Judaicam. Quid non audet projecta audacia τῶν νεωτερικῶν **? Longius etiam excurrit, &

* Tractatu de Scandalis.

** Horum Neotericorum.

plus sibi licere putat. Certè ipsi Apostoli, et si mandatum accepissent inducendæ *. Informatio nis Mosaicæ; tamen magis sibi videntur interdum temperâsse, quâm nunc Tui faciunt, qui penitus eradent alteram, cujus iis inductio alioqui mandata non est.

Non recuso Battologus ** videri, modò te obtundendo, & rem eandem inculcando, utilis sit expostulatio mea. Ergo repetam iisdem verbis, quod nuper ad te scripsi. Ipsi (dicebam) Apostoli, et si necessariò abrogarent ceremonias Mosaicas; tamen bono consilio ex Synagogâ ad suam Ecclesiam transtulerunt multos, qui utiles erant, ritus, multâsque Judæorum formulas retinuerunt, quibus etiam Christiani uterentur, & uti per suam Religionem poterant. Et tu nullam in antiquis formulis actionum Ecclesiasticarum reperisti, quâ uti dignareris, ut tantillum deferres & Antiquitati, & pacis studio, atque unitatis? Ipsos Novatianos, Donatistas, Pelagianos, non ausos esse in illis formulis quidquam mutare, tametsi sentirent sibi esse adversarias, ex CYPRIANO, OPTATO, AUGUSTINO didicimus. Ariani, & Macedoniani fuere audaciores; sed quâm acriter tunc repressi statim sunt? Cur hoc tempore audai-

* Abolendæ.

** Qui idem verbum sèpius repetit, sicut Battus ille Poëta in Hymnis suis idem repetens.

audaica major est? Facebat sanè ἡ κανοξηλία*: si maiores nostri, qui vel ex Iudeis, vel ex Ethnicis Christiani primū facti sunt, veterem (quod ajunt) salivam nimiū retinuerunt, & iis, quibus antea assueverant moribus, deinde addicti nimiū fuerunt; sed, ut iis temerè non est impingendum crimen τῆς κανοξηλίας: sic nos religiosæ imitationis, quæ nostræ successionis testis sit, pudere non debet. Nam & quæ in iis καινοτομία **. virtus fuit, cùm nova semel Ecclesia esset informanda; in nobis esset crimen, si alteram rursus transformationem instituamus. Itaque illis novum opus nuntiari jure non potuit, nobis posset: non enim dicere ausim illos cessasse, aut quod abollere & volebant, & debebant, aliâ viâ invexisse: ne dicerè videar (quod dictu nefas est) haec tenus & Synagogam perdurâsse, & Ecclesiam Christi nullam fuisse.

Memini, apud Danielem coniunctim prædici & Templi Hierosolymitani, quod eversum fuerat, ante Christum exhibitum, necessariam instaurationem, ejusdem postea necessariam vastitatem, atque eversionem cum suis & sacrificiis, & ceremoniis. Illos (de quibus loquor) veteres Christianos (nam de barbarâ, & degeneri posteritate non loquor) id

B 5

etiam

* Mala æmulatio.

** Novarum rerum molitio.

etiam non ignorasse planè existimo : neque mihi persuaserò , imprudentes quodammodo fuisse, quòd Julianum Apostatam conari dolebant, ut aliquod Judaicum Templum cum Leviticis ceremoniis restitueretur. Imò verò iterum dicam, his abrogatis, eos substituisse formam, quæ Christianismo, non Judaismo conveniret; quò magis in eâ observandâ consistamus. Ae ubi hæc effigies conspurcata, contaminata, obsoleta erit, reformationis penecillum potius, quàm inductionis spongiam arripiamus. Quid multa? Ego licet nævos, ut dixi, & rugas deleri optem; tamen illud Ecclesiæ (de quâ loquor) corpus, cuius profectò caput fuit Christus, & in cuius societatem atque communionem vocatæ sunt gentes, nunquam existimabo, aut fastidioso divertio repudiandum, aut hostili schismate discerendum, atque dilacerandum, aut tanquam profanum cadaver, sempiternâ cum ignominiâ nominis Christi sepeliendum, atque conculandum esse. Non existimabo (inquam) illius, de quo loquor, temporis Ecclesiam, ad quam tot in Scripturis promissiones, tot elogia etiam pertinent, nihil fuisse aliud, quàm quandam veluti chimæram.

Habes, mi CALVINE, sententiam in hoc genere meam, pluribus fortasse, quàm res postulabat, verbis expositam, sed quàm vi-
sum fuit exponere paulò verbosius, ut Ad-
versa-

versariis præciderem ansam calumniandi. Te porrò monere non audeo; sed, si pateris, tantùm rogabo, saltem ut memineris, quod aliquando in Pygium scripsisti, *tuam conditionem similiorum esse Prophetarum, quam Apostolorum conditioni, & illorum, quam horum certamina tuis esse similiora.* Si ita est, vide, num te magis, quam nunc facias, continere deceat; & reputa, quid sibi velit, quod in tuâ *Institutione* scripsisti, licet Hierosolymis Religio partim contempta, partim contaminata esset, tamen Prophetas neque novas propterea Ecclesias sibi erexit, neque nova Altaria extruxisse.

Neque verò si admoneri nolis, ipse recusem abs te moneri, si quid erro. Verùm ut bonà fide mecum agas, postulo, neque aut aliò me trahas, aut causæ nostræ statum perturbes. Magna profectò hæc causa est, quam nunc agimus, & omnium, quæ esse possunt, maxima. Ergo te per omnia sacra obtestor, atque etiam per Sacrosanctum Æterni, viventisque Dei, ac Domini Nomen adjuro, ut seriò, ut sedatè, ut graviter, ut religiosè etiam agas: minimè verò ut eludas, extra id, quod queritur, confusè alia miscendo, atque tumultuando, excurras. Nam & ne id facias, jam te saepius admonui, calvam esse tuam sive frustrationem, sive cavillationem, cùm, ubi de Reformatione rogati, laudamus veteris

ris Ecclesiæ formam, tu nobis exprobras deformitatem, quæ nunc est, quasi eam exoscularemur, quam exhorrescimus; neque non callidè ad nostri temporis fæcem exagitandam te confers, ut, cùm in hujus ætatis corruptione multa sint, quæ jure reprehendas, illam innocentem, atque religiosam antiquitatem, veluti per latus degeneris posteritatis perfidias. Si hæc non est intentio tua, nihil est, cur me petas.

Si antiquitatem (dico iterum) illam bonam revereris, consentimus. Castiga modò tuorum audaciam, insolentiam, insaniam, qui omnem illius memoriam abolere volunt; castiga multorum levitatem, vanitatem; ἐωλοκρατιαν*, qui odio sui temporis, illam Ecclesiam, cuius tanta semper fuit reverentia, tam valde oderunt, fastidiunt, repudiant, ejus ut nomen ferre vix possint; nihilque magis metuere videantur, quàm nè quid ex ejus formulis, ceremoniisve retinere, aut quidquam commune cum eâ, vel simile habere dicantur, præsertim quòd vel in oculos incurrat, vel auribus insonet.

Quid? eò res (ô tempora!) recidisse videtur, ut nunc quæratur, num aliqua ab Apostolis relictâ superstes sit Ecclesia Christiana,

* Pridianam, vel exoletam mixtionem, h. e. veterum rerum confusam narrationem.

na, quæ & testis veritatis, & custos Religionis, utriusque index fidelis esset? An verò ea, statim atque nata, & condita fuit, interierit, aut in Apostasim degenerarit? an denique tota nihil aliud fuerit, quam vanitas, impostura, somnium, ludibrium, superstitionis fabula? Et quid supereft, quam ut illam cum Aegeria* quādam conferant, qui hoc tempore audent veterum Christianorum Sacra cum deliriis Numæ Pompilii comparare? Qualem totius Religionis sive irrfisionem, sive labefactationem, sive etiam eversionem, eamque sive apertam, sive occultam, & subtilem qui titulo *Reformationis* venditant, quomodo tibi tolerabiles, atque ferendi esse videantur, nescio. Sed mihi, qui tales indignitatem concoquere non possum, minus succensere profectò debes; præsertim cum non magis ferendos esse sentiam, qui illos adjuvant, cum se repugnare clamant: hoc est, qui res depravatas præfractè, & confusè tuendo, rerum bonarum integratatem permiscent, & propè obruunt. Sic non modo nocent, qui Ecclesiā veluti depositam jugulant; sed & qui morbum nullum agnoscendo, nullam admittunt medicinam.

In

* Aegeria Nympha fuit, cum quā Numa Pompilius & connubium, & colloquium se habere simulavit de cultu Religionum.

In hac vero tanta rerum desperatione, quid me aliud facere vis, quam quod facio, cum interea Deum vindicem & appello, & expecto? In horum quidem certè temporum confusione, & certaminum fluctibus, & dissensionum tumultibus, quodnam meum votum sit, jam pridem legisti: legisti, quod jam pridem sum professus, omnibus votis me optare, tandem aliquando, tandem ut illam, quæ cœlum, & terram olim recreavit, & nunc iterum, iterumque recrearet, vocem CONSTANTINI nostri ad Alexandrinos, illum (inquam) verè Evangelicum, nuntium audire, priusquam ex hâc vitâ migremus, liceat: τας διχονοίας, τὰ σπώματα, τὰς θορύβους, κατὰ τὴν τὰς χριστὰς κέλευσιν, ἢ τῆς ἀληθείας ἐνίκησε λαμπρότης *.

Tum verò etiam sperabimus; iterum nos illam Ecclesiam in integrum restitutam visuros esse, cuius ipsos quoque Angelos non solum Custodes, sed & Auditores, & Discipulos quodammodo esse, Apostolus significavit. Illam dico, quam idem ait esse Domum Dei, Columnam & basin veritatis, quamque tu interpretatus es propterea ita appellari, quia fida sit custos veritatis, ne hæc in Mundo intercidat. Interea quid est, quod in meo desiderio requiri-

* Perplexas sententias, cavillationes, tumultus, contra Christi præceptum, veritatis vicit splendor.

ris? Si hanc miserè deformatam abs Barbaris
fuisse, clames, justissimum clamorem tuum lau-
do: Si deplores, seriam ejus restituendæ cu-
ram multis jam annis nullam fuisse, conjungam
meos gemitus: si cum Apostolo, Deum irri-
deri non posse dicas, tamen multos ei illude-
re velle, tibi succinam: Si, quod & AENEAS
SYLVIVS suo tempore conquestrus est, multò
magis conqueraris, Ecclesiam (ut ait) jactari,
sicuti pila jaqtatur, volviturque à pueris luden-
tibus, tecum exclamabo, intolerabile esse hoc
ludibrium, & propterea pios omnes vel dolo-
re contabescere, vel indignatione disrupti de-
bere. Denique, si erumpas in illam, quam
sæpe in ore habes, Prophetæ indignantis gra-
vem quærimoniam: *Quousque Domine? religosi*
Zeli vehementiam prædicabo: sed, cum de re-
formatione agetur, fremas licet, recurram
ad illam, quam dixi, effigiem, & iisdem, qui-
bus antè fuerat, coloribus nunc renovandam
esse contendam, atque cum prioribus linea-
mentis, fundamenta priora repetenda esse di-
cam; ut & olim Jeremias Propheta prædice-
bat, Hierusalem rursus ædificatum iri in suo
acervo, vel suorum ruderum cumulo *. De-
nique, ut antea ad te scripsi, redivivo potius,
quam novo Saxo, Templum hoc nostrum re-
parandum esse, rogabo, ut ex ipsis ruinis la-
pides antiqui repetantur, atque feligantur, qui-
bus

* 2. Esd. C. 4.

bus hoc aedificium in integrum restituatur; eos semper dico, qui recti, atque integri sunt.

Hic ergo pro coronide mihi liceat erumpere in illam Psalmi vocem: *Exurge Domine, et miserearis Sion* *. Servi tui diligunt lapides ejus, & pulveris ejus miseret eos. Interea vero consolatio quænam nostra erit? Ut, cum olim instaurabatur Templum, quod minus accedere videbatur ad splendorem, atque majestatem structuræ Salomonis, pios homines propterea mæstos consolatus est Propheta, pollicitus, fore, ut aliquando surgeret Ecclesia Christiana, quæ longè superaret gloriam prioris Templi **; Sic jam cum hujus Ecclesiæ instauratio talis non esse videtur, quam optaremus; spes illa nos consoletur, fore, ut aliquando in cœlis conspecturi simus multo excellentiorem, quam in Orbe terrarum unquam fuerit; neque tamen interea desinamus persequi qualemcunque instaurationem, quæ, ut ut potest, utcunque se se refert ad formam priorem.

Quod ad Rempubli. attinet, quam mirificè concutis, & labefactas, CALVINE, nihil dico.

* Ps. 101. à §. 14.

** Aggæ. 2. §. 10.

dico. Quaecunque tandem ejus forma plā-
cuerit, non repugno. Sed neque eam Roma-
nis Legibus (has licet prædicare, & interpre-
tari soleamus) neque magis, quam Mosaicis,
alligatam esse contendō : dissimulare tamen
non possum, in hoc quoque genere injustam
quandam esse tuam intemperantiam. Cūm
hodie, in gratiam tuam, relegerem Macca-
bæorum historiam, cuius paulò antè memini,
legi tuum illum Judam fœdus cum Romanis
feriisse : & in eādem historiā observavi, non
temerè laudari Senatūs Romani pro Republ.
curam, continentis Populum in honestā mo-
deratæ vitæ ratione ; sed, cūm eodem tem-
pore tuos in Daniēlem Commentarios percur-
rerem, miratus sum, te illi tam laudatæ Rei-
publ. supra modum maledicere : nam, cūm
Cyneas, ille sapiens Pirrhi Legatus, olim dxiis-
set, tot videri posse Reges, quot Roma vi-
derat Senatores, tu exclamas, multò melius
dicturum fuisse, toridem esse latrones, &
Tyrannos. Aīs, nullam in iis fuisse micam
æQUITATIS: Ciceronem vocas impurum rabu-
lam; Catonem, nebulonem; totum illius Im-
perii Corpus fuisse horrendam colluviem; in
totâ illâ gente fuisse immanem barbariem; non
fuisse Rempubl., sed confusum, nescio quid,
monstro simile. Hæc, inquam, cūm lege-
rem tam intemperanter, & iracundè abs te
dicta, scriptaque; equidem propè attonitus
obstupui; & Jurisprudentiæ nostræ odio quo-

dam in ea te erupisse sum suspicatus; neque talem injuriam facile potui concoquere.

Religionis veræ & contemptores, & adversarios, & imperitos fuisse illos Sapientes Romanos, meritò vociferaris: & ego jam pridem accusavi profana eorum iudicia, & laudavi AUGUSTINI * censuram de Varronis libris Rerum Divinarum, atque Humanarum. Sed Civilis Justitiæ, atque Æquitatis nullam in illo Senatu, in illâ Gente, in illâ Republ. fuisse aut scientiam, aut curam, qui tecum dicere possem, cùm ex Juris, & Legum Roman. libris quotidie longè aliud percipiam? An jam tibi liceat, quod illi olim non licuit, qui in veteri Satyrâ laudatur, quod Ciceronem Allobroga dixit, videris. Vereor enim, ne Literatos omnes propterea habens infestos Adversarios, & ipse tuus filiolus Ciceronico la multò magis, licet clam, tuo convicio maledicat, qui, honoris ergo, *Ciceronis Orationes* istic excusas tibi donavit, dicavit, consecravit. Sed Catones, Fabricios, & similes habere pro Nebulonibus, grave est, & ipse ZWINGLIUS tuus, si viveret, hoc convitium tuum minimè ferre posset, qui etiam illis plus tribuit, quam Religio nostra permittat. Quid MELANCHTHONEM tuum tibi opponam, qui unus

* De Civ. Dei. L. 6. C. 2.

unus & Rempubl., & Senatum, & Jurisprudentiam Rom. magis prædicat, quām quidquam nostrum? Neque mei nunc instituti, neque hujus loci est, vel hanc causam agere, quæ sæpè acta est, vel dignitatem Jurisprudentiæ Rom., cui operam damus, vel artem Aequi, & Boni, quam profitemur, vel ejus Authores defendere, quod factum aliàs satis, supérque fuit.

Ceterūm ut tibi rursus satisfaciam, iterūmque iterūmque profiteor, causam Religionis veræ, quam illi impiè pessundare voluerunt, longè præferendam esse & Rebuspubl. omnibus, & cuicunque dignitati Civili. Quinimò libenter audio, quod ex Jesaiâ refers, propter Ecclesiā & conditum esse, & consistere hunc terrarum Orbem, qui in novum alioqui Chaos recideret. Sed neque ipse ignoras, toties me hoc egisse, studium ut Religionis cum studio Juris Civilis conjungendum esse, & illud huic præire debere, probarem, ut hoc meum desiderium profanis quibusdam Leguleiis, in tuo etiam sinu latitantibus molestissimum fuerit; neque tu illi fueris æquior, qui nihil rectum putas, quām quod ipse facis, & præscribis. Imò verò ut illi suaviter irrident, me ista curare, cùm neque Theologus sim, neque in Ecclesiâ quidquam habeam muneris; neque meā privatim intersit, etiamsi omnia perturbes, atque pessundes: mihi que-

propterea objiciunt illud ex Comædia: *Tan-*
sumne est abs rc tuâ otii tibi, aliena ut cures,
eaque, nihil quæ ad te attinent: Sic tu, qui
tantò magis laudare deberes sollicitas piorum
hominum (tui licet ordinis non sint) de Reli-
gione cogitationes; tamen eos magis ferre
potes, qui aliis literis addicti, planè abji-
ciunt, atque respuunt studia Religiosa, quam
qui, ut his operam aliquando dent, res
alioqui suas negligunt. Vale.

Ex Urbe IX. Kal. Novemb.
1563.



Eidem.